

PAKAAMMO ITI PUBLIKO

DAGITI SINGASING NGA ENMIENDA TI NAREBISAR A CHARTER TI COUNTY TI MAUI (1983), KAS NAAMENDARAN

Kas mayayon iti Seksion 14-2.2 ti Narebisar a Charter ti County ti Maui (1983), kas naamendaran, dagiti sumaganad ket dagiti enmienda ti Charter kas isingasing ti Konseho ti County ti Maui. Addaan ti tunggal enmienda iti espesipiko a saludsod a mainaig iti enmienda nga agparangto iti balota ti Eleksion Heneral iti 2016.

SALUDSOD A MABOTOSAN: MAUI: Panangibabawi iti Pirma Manipud iti Nayon Wenno Supplemental a Petision

Nasken kadi a maamendaran dagiti Seksion 11-4 ken 11-5 ti Charter tapno maatur dagiti biddut ti pannakaisuratna no adda ken tapno maipaay ti panagmaymaysa dagiti linaon ti Charter babaen ti pannakaipalubos ti maysa a tao a mangibabawi iti pirmana manipud iti nayon wenno supplemental a petision?

SINGASING NGA ENMIENDA TI CHARTER

Seksion 11-4. Panagipila ken Sertipikasion.

1. Iti uneg ti sangagasut ket walopulo (180) nga aldaw kalpasan ti pannakaipilana iti klerk ti county kas nailawlawag iti 11-2, amin a papeles nga adda pakainaiganna iti inisiatibo a petision ket maurnong ken maipila wenno maidatag iti klerk ti county a kas maymaysa nga instrumento wenno petision. No ti maysa nga indibidwal a nagpirma iti petision ket kalikagumanna nga ibabawi ti pirmana manipud iti petision, nasken a mangidatag iti naisurat a pakaammo ti panangibabawina iti pirmana iti uneg ti sangapulo ket lima (15) nga aldaw kalpasan ti pannakaipila dagiti [nasapataan a kasuratan wenno affidavit] petision a kas nailawlawag iti Seksion [11-2] 11-3.

Seksion 11-5. Dagiti Nayon Wenno Supplemental a Petision.

1. Iti kanito a ti nangrugian a petision ket agkurkurang iti balido a pirma, mabalina a masuportaran daytoy iti nayon a pirma dagiti botante a napirmaan iti wagas a kas mayayon iti Seksion 11-3 daytoy nga Artikulo. Dagita a nayon a pirma ket maisilpo iti nangrugian a petision iti ania man a kanito iti uneg ti duapulo (20) nga aldaw kalpasan a naawat ti komite dagiti petitioner ti pakaammo a ti klerk ti county ket sinertipikaranna a ti nangrugian a petision ket awanan iti umdas a balido a pirma. No ti maysa nga indibidwal a nagpirma iti supplemental a petision ket kalikagumanna nga ibabawi ti pirmana manipud iti supplemental a petision, nasken a mangidatag iti naisurat a pakaammo ti panangibabawina iti pirmana iti uneg ti tallo (3) nga aldaw kalpasan a naawat ti klerk ti county dagiti nayon a pirma.

SALUDSOD A MABOTOSAN: MAUI: Pannakarepaso ti Nayon Wenno Supplemental a Petision

Nasken kadi a maamendaran ti Seksion 11-5 ti Charter tapno mapalubosan ti Klerk ti County a mangrepaso iti nayon wenno supplemental a petision iti uneg ti duapulo (20) nga aldaw, a saan ketdi a sangapulo (10) nga aldaw laeng?

SINGASING NGA ENMIENDA TI CHARTER

Seksion 11-5. Dagiti Nayon Wenno Supplemental a Petision.

2. Masapul nga iti uneg ti [sangapulo (10)] duapulo (20) nga aldaw kalpasan a naipila wenno naidatag dagiti nayon a pirma, amirisen ti klerk dagitoy ken nasken a madagdagus a mangipaulog iti sertipikasion nga adda umdas a bilang ti pirma. Nasken a maipatulod dayta a sertipikasion iti komite dagiti petitioner.

SALUDSOD A MABOTOSAN: MAUI: Ahensia a Mangimaton Kadagiti Di Mapakpakadaan a Pasamak

Nasken kadi a maamendaran ti Charter tapno mabaliwan ti nagan ti Ahensia ti Depensa Sibil (Civil Defense Agency) tapno agbalin nga Ahensia ti County ti Maui a Mangimaton Kadagiti Di Mapakpakadaan a Pasamak (Maui County Emergency Management Agency)?

SINGASING NGA ENMIENDA TI CHARTER

Seksion 8-7.2. Komision iti Uram ken iti Seguridad ti Publiko (Fire and Public Safety Commission). Ti komision iti uram ken iti seguridad ti publiko ket buklen to ti siam a kameng a dutokan ti mayor babaen ti panangaprobar ti konseho.

Ti komision iti uram ken iti seguridad ti publiko ket:

1. Mangipakat kadagiti pagannurotan nga ibilangna a nasken iti panangipatungpalna kadagiti pagrebbenganna ken iti pannakaimaton dagiti banag a naipakomit kenkuana babaen ti linteg.

2. Mangrepaso ken mangidatag iti mayor iti kiddaw ti [departamento] departamento ti uram ken ti seguridad ti publiko para iti tinawen a badiet wenno presupuesto para iti pannakaipataray ti departamento.

3. Mangrepaso iti pannakapataray ti departamento ti uram ken ti seguridad ti publiko ken ti ahensia ti [depensa sibil] County ti Maui a mangimaton kadagiti di mapakpakadaan a pasamak (Maui County emergency management agency) ken mangaramid kadagiti rekomendasion a mabalina a maikanatad para iti pannakapasayaat dagiti annongen maipanggep kadagiti emerhensia wenno di mapakpakadaan a pasamak ken dagiti probision dagiti serbisio a para iti seguridad ti publiko.

4. Mangawat, mangrepaso, ken mangimbestigar kadagiti ania man pammabasol nga idatag ti publiko kontra iti aramid ti departamento ti uram ken ti seguridad wenno ti asino man kadagiti kamengna ken mangidatag iti naisurat a report dagiti natakuatanna ken dagiti rekomendasionna iti hepe dagiti bombero tapno kednganna daytoy.

5. Tinawen a repasuen ken amirisenna ti nagapuanan ti hepe dagiti bombero ken idatag ti reportna iti mayor ken iti konseho.

6. Mangidatag iti tinawen a report iti mayor ken iti konseho maipanggep kadagiti inaramid wenno aktibidadna.

7. Maipaayan kadagiti dadduma pay a bileg ken aramiden a kas ipalubos ti linteg.

Malaksid kadagiti panggep a panagsaludsod wenno ania man nga ipalubos daytoy a charter, ti komision wenno dagiti kamengna ket awan karbenganda a makibiang kadagiti aramid nga administratibo ti departamento.

TSAPTER 16

AHENSIA TI [DEPENSA SIBIL] COUNTY TI MAUI A MANGIMATON KADAGITI DI MAPAKPAKADAAN A PASAMAK (MAUI COUNTY EMERGENCY MANAGEMENT AGENCY)

Seksion 8-16.1. Pannakabukel ken dagiti Pagrebbenganna. Addanto ahensia ti [depensa sibil] County ti Maui a mangimaton kadagiti di mapakpadakaan a pasamak (Maui County emergency management agency) a dagiti bileg, pagrebbengan, aramiden ken pakabuklanna ket mayayonto iti linteg. Ti komision iti uram ken iti seguridad ti publiko, a nabangon kas sagudayen ti Seksion 8-7.2 daytoy a charter, ket isunto ti mangrepasso iti pannakapataray ti ahensia ken ken mangaramid kadagiti rekomendasion a mabalina maikanatad para iti pannakapasayaat dagiti annongen maipanggep kadagiti emerhensia wenno di mapakpakadaan a pasamak ken dagiti probision dagiti serbisio a para iti seguridad ti publiko. Ti komision ket agawatto ken imbestigarennanto dagiti ania man a reklamo nga idatag ti publiko kontra iti aramid ti ahensia wenno ti asino man kadagiti kamengna ken mangidatag iti naisurat a report dagiti natakuatanna ken dagiti rekomendasionna iti administrador ti [depensa sibil] County ti Maui a mangimaton kadagiti di mapakpakadaan a pasamak (Maui County emergency management tapno kednganna daytoy

SALUDSOD A MABOTOSAN: MAUI: Pannakaaprobar ken Dagiti Kualipikasion Dagiti Nadumaduma a Direktor

Nasken kadi a maamendaran ti Charter tapno kasapulan ti panangaprobar ti Konseho kadagiti dutokan ti Mayor a Mangimaton a Direktor, Direktor ti Kuarta ti Gobierno, Direktor ti Obras Publikas, Direktor Dagiti Parke ken Pagpalaliwaan, Direktor ti Panagpabalay ken Pakaseknan Dagiti Tattao, Direktor ti Transportasion, ken ti Direktor ti Pannakaimaton ti Aglawlaw ken ti Nakaparsuaan ken tapno mapalubosan ti pannakaituyang dagiti nayon a kualipikasion a para kadagiti direktor dagiti departamento a maparnuayto babaen ti ordinansa?

SINGASING NGA ENMIENDA TI CHARTER

**Seksion 6-4. Dagiti Espesipiko a Kualipikasion Dagiti Pangulo
Administratibo Dagiti Departamento.** Kas nayon dagiti ania man a kualipikasion nga

intuyang daytoy a charter, dagiti espesipiko a kualipikasion a para dagiti pangulo administratibo a dutokan ti mayor ket mabalin nga ituyang ti konseho babaen ti ordinansa.

Seksion 3-8. Dagiti Saan a Maaramid ti Konseho ken Dagiti Kameng ti Konseho.

1. [Awan ti asino kadagitoy] Malaksid no naibaga iti daytoy a charter, awan ti asino kadagitoy, ti man komite wenno dagiti kamengna, iti ania man a wagas, ket diktaranna ti pannakadutok wenno pannakaikkat ti asino man nga opisial wenno empleado a dinutokan ti mayor wenno dagiti adda iti babaen ti mayor.

2. Awan ti asino kadagitoy, ti man konseho wenno dagiti kamengna, ti mabalin a mangbilin iti asino man nga empleado wenno opisial ti county malaksid kadagiti nadutokan iti babaen ti Seksion 3-7 wenno Artikulo 5, iti man publiko wenno iti man pribado a kasasaad. Ania man a nairanta a panaglabsing iti daytoy a subseksion ti asino man a kameng ti konseho ket umdasen a makaigapu iti pannakaikkat dayta a kameng ti konseho babaen ti impeachment wenno pannakapatapuakna iti serbisio.

Seksion 6-2. Pannakadutok ken Pannakaikkat Dagiti Opisial ken Dagiti Empleado.

1. Ti pangulo administratibo ti maysa a departamento ket saanna a mabalin ti mangdutok iti empleado nga ad-adu ti bilangna ngem iti para iti badiet nga inlatang ti konseho.

2. Awan ti asino man nga autoridad a naikkan iti bileg nga agdutok iti asino man a tao para iti maysa nga opisina wenno takem a di sakup ti serbisio sibil malaksid no makalasad iti maysa a maikanatad nga imbestigasion a dayta a tao a madutokan ket naan-anay a kualipikado gapu iti padasna wenno abilidadna a mangipatungpal kadagiti pagrebbenganna iti dayta nga opisina wenno takem.

3. Ti kapaut ti panagtakem ti asino man a pangulo administratibo ti departamento a dinutokan ti mayor[, a pakairaman ti mammagbaga wenno abogado ti korporasion wenno corporation counsel ken ti piskal wenno prosecuting attorney,] ket aggibus apaman met nga aggibus ti panagtakem ti mayor, malaksid no dayta a pangulo administratibo ket naikkat a nasapsapa a kas sagudayen daytoy a charter. Dagiti kakastoy nga opisial ket saanda a mapalubosan nga agtakem iri nasursurok ngem innem a pulo (60) nga aldaw kalpasan ti panagpaso ti termino ti panagtakemda, ket madagdagusto a bakanteanda dagiti iggemda nga opisina iti panaggibus ti 60 nga aldaw a naited a pawayway wenno apaman nga adda madutokan a kasukatda kas mayayon iti daytoy a charter, ania man kadagitoy ti umun-una.

4. Ti mayor ket maaddaanto iti bileg nga agdutok, iti temporario a wagas, iti pangulo administratibo ti ania man a departamento, no la ketdi dayta a departamento ket isu ti ayan dayta a pangulo administratibo a dinutokan ti mayor.

5. Iti uneg ti innem a pulo (60) nga aldaw a kaaddana iti takem, wenno iti uneg ti innem a pulo (60) nga aldaw kalpasan nga adda mabakante a puesto, ti mayor ket dutokannanto ti mangimaton a direktor, mammagbaga wenno abogado ti korporasion wenno corporation counsel, [ken] piskal wenno prosecuting attorney, direktor ti kuarta ti gobierno, direktor ti obras publikas, direktor dagiti parke ken pagpalpaliwaan, direktor ti panagplano, direktor ti panagpabalay ken pakaseknan dagiti tattao, direktor ti suplay ti danum, direktor ti transportasion, ken direktor ti pannakaimaton ti aglawlaw ken ti nakaparsuaan, a kakuyogna ti naisurat a pakaammo ti pannakadutokda a maited iti konseho. Ti konseho ket patalgedanna wenno dina anamongan ti [kompirmasion]

pannakadutok iti uneg ti innem a pulo (60) nga aldaw kalpasan a maawatna ti pakaammo ti panagdutok nga inaramid ti mayor. No ti konseho ket awan ti aramidenna maipanggep iti daytoy iti uneg ti 60-nga aldaw, ti panagdutok ket maibilang a napatalgedan. Ti nadutokan a [mammagbaga wenno abogado ti korporasion wenno corporation counsel ken piskal wenno prosecuting attorney] ket agtakem a dagus apaman a dutokan ida ti mayor ngem saanda nga ituloy ti panagtakemda iti kanito a ti pannakadutokda ket [saan a kompirmaran] saan nga anamongan ti konseho, ngarud ti mayor mangaramid iti sabali a panagdutok iti uneg ti innem a pulo (60) nga aldaw a kapaut ti panawen manipud iti di pananganamong ti konseho, ket ti konseho nasken a kompirmaranna wenno dina anamongan daytoy iti uneg ti innem a pulo (60) nga aldaw kalpasan a maawatna ti pakaammo ti baro a panagdutok ti mayor, No ti konseho ket awan ti aramidenna maipanggep iti baro a panagdutok iti uneg ti naited a 60-nga-aldaw a kapaut ti panawen, ti panagdutok ket maibilang a napatalgedan.

Seksion 8-1.2. Mangimaton a Direktor. Ti mangimaton a direktor ket dutokanto ti mayor babaen ti panangaprobar ti konseho ken mabalin nga ikkaten ti mayor iti takemna. Ti mangimaton a direktor ket masapul nga addaan iti di nakurkurang ngem lima a tawen a tawen a padas iti panangimaton, iti man maysa a negosio a kukua ti gobierno wenno pribado, wenno agpada.

Seksion 8-2.2. Mammagbaga wenno Abogado ti Korporasion wenno Corporation Counsel. Ti mammagbaga ti korporasion ket dutokanto ti mayor babaen ti panangaprobar ti konseho ken mabalin nga ikkaten ti mayor babaen ti panangaprobar ti konseho. Ti mammagbaga ti korporasion ket masapul a maysa nga abogado a lisensiado a mangabogado ken nasayaat ti pakasarsaritaanna iti sanguanan ti Korte Suprema ti Estado ken nagpapaay a kas abogado iti di nakurkurang ngem [tallo] lima a tawen.

Seksion 8-3.2. Piskal wenno Prosecuting Attorney. Ti piskal wenno prosecuting attorney ket dutokanto ti mayor babaen ti panangaprobar ti konseho ken mabalin a maikkat babaen ti panangaprobar ti konseho. Ti piskal ket masapul a maysa nga abogado ken lisensiado a mangabogado ken nasayaat ti pakasarsaritaanna iti sanguanan ti Korte Suprema ti Estado ken nagpapaay nga abogado iti di nakurkurang ngem [tallo] lima a tawen.

Seksion 8-4.2. Direktor ti Kuarta ti Gobierno. Ti direktor ti kuarta ti gobierno ket dutokanto ti mayor babaen ti panangaprobar ti konseho ken mabalin nga ikkaten ti mayor iti takemna. Ti direktor ti kuarta ti gobierno ket masapul nga addaan iti di nakurkurang ngem lima a tawen a padas iti maysa a publiko wenno pribado a takem iti panagiggem iti kuarta, ken di nakurkurang ngem tallo [a tawen] nga adda iti kapasidad administratibo.

Seksion 8-5.2. Direktor ti Obras Publikas. Ti direktor ti obras publikas ket dutokanto ti mayor babaen ti panangaprobar ti konseho ken mabalin nga ikkaten ti mayor iti takemna. Ti direktor ti obras publikas ket masapul nga addaan iti di nakurkurang ngem lima a tawen a padas iti kapasidad administratibo, iti man serbisio publiko wenno iti sektor pribado, wenno agpada.

Seksion 8-6.2. Direktor Dagiti Parke ken Pagpalaliwaan. Ti direktor dagiti parke ken pagpalaliwaan ket dutokanto ti mayor babaen ti panangaprobar ti konseho ken mabalin nga ikkaten ti mayor iti takemna. Ti direktor dagiti parke ken pagpalaliwaan ket masapul nga addaan iti di nakurkurang ngem lima a tawen a padas iti kapasidad administratibo, iti man serbisio publiko wenno iti sektor pribado, wenno agpada.

Seksion 8-8.2. Direktor ti Panagplano. Ti direktor ti panagplano ket dutokanto ti mayor babaen ti panangaprobar ti konseho ken mabalin nga ikkaten ti mayor iti takemna. Ti direktor ti panagplano ket masapul nga addaan iti di nababbaba ngem lima a tawen a padas iti tay-ak ti panagplano, ken di nakurkurang ngem tallo a tawen nga adda iti kapasidad administratibo[.], iti man serbisio publiko wenno iti sektor pribado, wenno agpada.

Seksion 8-10.2. Direktor ti [ti Departamento ti] Panagpabalay ken Pakaseknan Dagiti Tattao. Ti direktor ti [ti departamento ti] panagpabalay ken pakaseknan dagiti tattao ket dutokanto ti mayor babaen ti panangaprobar ti konseho ken mabalin nga ikkaten ti mayor iti takemna. Ti direktor ti [departamento ti] panagpabalay ken pakaseknan dagiti tattao ket masapul nga addaan iti di nababbaba ngem lima a tawen a padas iti kapasidad administratibo, iti man serbisio publiko wenno iti sektor pribado, wenno agpada.

Seksion 8-11.5. Direktor ken Katulongan a Direktor ti Suplay ti Danum. Ti direktor ti [ti departamento ti] suplay ti danum ket dutokanto ti mayor babaen ti panangaprobar ti konseho, ken mabalin nga ikkaten ti mayor iti takemna. Ti direktor ti [ti departamento ti] suplay ti danum ket masapul nga addaan iti di nababbaba ngem lima a tawen a padas iti kapasidad a panangimaton, iti man serbisio publiko wenno sektor pribado, wenno agpada. Ti katulongan a direktor ti [ti departamento ti] suplay ti danum ket dutokanto ti mayor ken mabalin nga ikkaten ti mayor iti takemna. Ti direktor wenno ti katulongan a direktor ti [ti departamento ti] suplay ti danum ket masapul a rehistrado nga inheniero.

Seksion 8-14.2. Direktor ti Transportasion. Ti direktor ti transportasion ket dutokanto ti mayor babaen ti panangaprobar ti konseho ken mabalin nga ikkaten ti mayor iti takemna. Ti direktor ti transportasion ket masapul nga addaan iti di nababbaba ngem lima a tawen a padas iti kapasidad administratibo, iti man serbisio publiko wenno iti sektor pribado, wenno agpada.

Seksion 8-15.2. Direktor ti Pannakaimaton ti Aglawlaw ken ti Nakaparsuaan. Ti direktor ti pannakaimaton ti aglawlaw ken ti nakaparsuaan ket dutokanto ti mayor babaen ti panangaprobar ti konseho ken mabalin nga ikkaten ti mayor iti takemna. Ti direktor ti pannakaimaton ti aglawlaw ken ti nakaparsuaan ket masapul nga addaan iti di nababbaba ngem lima a tawen a padas iti kapasidad administratibo, iti man serbisio publiko wenno iti sektor pribado, wenno agpada.

SALUDSOD A MABOTOSAN: MAUI: Opisina Dagiti Abogado Dagiti Serbisio ti Konseho

Nasken kadi a maamendaran dagiti Seksion 3-6, 3-7, ken 8-2.3 ti Charter tapno mapalubosan dagiti abogado nga adda iti Opisina Dagiti Serbisio ti Konseho (Office of Council Services), malaksid pay kadagiti abogado nga adda iti Departamento ti Mammagbaga iti Korporasion (Department of the Corporation Counsel), nga agpaayda a mammagbaga maipanggep iti linteg iti Konseho ken dagiti kamengna, ken tapno mapalubosan ti Konseho a mangdesignar, babaen ti dua-nga-apagkatlo a botos dagiti amin a kameng, kadagiti abogado nga adda iti Opisina Dagiti Serbisio ti Konseho a kas espesial a mammagbaga maipanggep iti linteg tapno agpaayda a kas legal a pannakabagi para kadagiti ania man a naisangsangayan a banag a pakasapulan iti kasta a panagpaayda?

SINGASING NGA ENMIENDA TI CHARTER

Seksion 3-6. Dagiti Bileg ti Konseho. Ti konseho ket isunto ti lehislatibo a bagi ti county. Iti awan pananglimitar kadagiti sumaganad pammalubos wenno dadduma pay a bileg nga inkawes kenkuana daytoy a charter, ti konseho ket addaan iti bileg a:

1. Mangituyang babaen ti lehislasion kadagiti bayadan a buis, rata, masingir, ebaluasion ken espesial nga ebaluasion ken ibubulod iti kuarta, agbatay kadagiti limitasion nga intuyang ti linteg ken daytoy a charter.

2. Mangituyang babaen ti lehislasion kadagiti badiet nga aramaten ti county maibatay kadagiti limitasion nga intuyang daytoy a charter.

3. Mangiwayat kadagiti imbestigasion mainaig iti (a) pannakapataray ti ania man a departamento wenno aramid ti county ken (b) ti ania man a suheto a kayat ti konseho nga ipandayan iti lehislasion.

4. Mangituding kadagiti sueldo dagiti empleado ken opisial no kasapulan.

5. Mangibilin iti pannakaaramid dagiti kasapulan a masansan a report ken dagiti espesial a report manipud kadagiti amin a departamento ti county a mainaig kadagiti aramidna ken iti pannakapataray ti departamentoda. Dagitoy a report ket makiddawto ken maisubmitirdanto ken iti babaen ti mayor.

6. Tapno pagtalinaeden, [wenno] yempleo, wenno designaranna, babaen ti botos a dua-nga-apagkatlo ti sibubukel a kamengna, iti espesial a mammagbagana (special counsel) a kas legal a pannakabagina para iti ania man nga espesial a banag a makaigapu iti panagkasapulan iti kasta a trabaho. Ti ania man a kasta a trabaho ket yispesipikarna ti tangdan, no adda man, a nasken a mabayadan para kadagiti nasao a serbisio.

7. Tapno agdesignar kadagiti abogado nga adda iti opisina dagiti serbisio ti konseho tapno agpaayda a kas legal a mammagbaga.

Seksion 3-7. Opisina Dagiti Serbisio ti Konseho.

1. Addanto maparnuay nga opisina dagiti serbisio ti konseho. Ti konseho ket mabalinna ti mangparnuayto kadagiti takem wenno posision iti opisina dagiti serbisio ti konseho kas kasapulan tapno adda katulonganna iti panangipakatna iti bilegna a lehislatibo. Dagiti sueldo kadagiti kasta a posision ket maitudingto babaen ti ordinansa.

Dagiti tattao a madutokanto kdagiti kakasta a posision baben ti konseho ket saandanto a masakupan ti serbisio sibil.

2. Dagiti abogado nga adda iti opisina dagiti serbisio ti konseho, malaksid pay dagiti abogado nga adda iti departamento ti mammagbaga iti korporasion, ket mabalin nga agpaayda a mammagbaga maipanggep iti linteg iti konseho ken kadagiti kamengna.

Seksion 8-2.3. Dagiti Bileg, Pagrebbengan, ken Aramid. Ti mammagbaga wenno abogado ti korporasion ket:


1. Mangdutok iti katulongan nga abogado ti korporasion ken kadagiti kasapulan nga empleado a kas ipalubos ti konseho. Ti katulongan nga abogado ti korporasion ket saanto a sakupen ti serbisio sibil ken agpaayto agingga iti kasapulan isuna ti mammagbaga wenno abogado ti korporasion.

2. Agbalin a hepe a mammagbaga maipanggep iti linteg (chief legal advisor) ken abogado a pannakabagi ti County ti Maui, ti konseho, ti mayor, dagiti amin a departamento, ken amin dagiti hunta ken komision, ken dagiti amin nga opisial ken empleado maipanggep kadagiti amin a banag nga adda pakainaiganda kadagiti opisial a pagrebbenganda[.], malaksid no adda sabali a maibagbaga iti daytoy a charter.

3. Ibagianna ti county kadagiti amin a banag a mapagsasaritaan iti pangukoman.

4. Mangipatungpal kadagiti dadduma pay a pagrebbengan ken aramid a mabalin a pakaseknan ti departamento wenno kas kasapulan ti linteg.

NAARAMID iti daytoy maika-2 nga aldaw ti Septiembre



DENNIS A. MATEO, KLERK TI COUNTY
COUNTY TI MAUI, ESTADO TI HAWAII